

BARAKA ZA KUTUMIKA CHINI YA WATU WENGINE



**Baraka 10 zitakazokusaidia
kuifikia hatima yako
kwa urahisi**

ADRIANO MKONDA

BARAKA ZA KUTUMIKA CHINI YA WATU WENGINE

Baraka 10 Zitakazokusaidia Kuifikia Hatima Yako Kwa Urahisi

© Agosti 2023 by Adriano Mkonda

Simu: +255 656 189 370, +255 621 618 821

Barua pepe: mkondaadriano10@gmail.com

Haki zote zimehifadhiwa. Huruhusiwi kuiga, kunakiliki, kupiga chapa, kutafsiri au kutoa sehemu yoyote ya kitabu hiki kwa njia yoyote bila idhini ya mwandishi.

Kimeandaliwa na;

DIVINE TRANSFORMATION GLOBAL (DITRA Global)

Simu: +255 656 189 370

Barua pepe: ditraglobaltz@gmail.com

Facebook: Ditra Global Tanzania,

Instagram: ditra_global

WhatsApp link: <https://wa.me/message/WSSND7DQJGVC01>

Isipokuwa imeelekezwa, maandiko yote yamenukuliwa kutoka katika Maandiko Matakatiifu ya Mungu yaitwayo Biblia yaani agano la kale na jipya, tolea la Swahili Union Version (SUV) © Bible Society of Tanzania 1997

YALIYOMO

Nasaha Za Wasomaji	2
TABARUKU	3
SHUKRANI.....	4
DIBAJI	5
UTANGULIZI.....	7
Dhana Ya Kutumika Chini Ya Watu Wengine	11
Baraka #1: Kupata Jina (Utambulisho).....	13
Baraka #2: Kupata Kibali Cha Kiungu	20
Baraka #3: Muunganisho Wa Kiungu.....	24
Baraka #4: Kutahiriwa (Kutengenezwa)	30
Baraka #5: Kuongezewa Thamani.....	35
Baraka #6: Upako.....	38
Baraka #7: Uzoefu.....	42
Baraka #8: Kupata Mtandao	45
Baraka #9: Ushawishi.....	48
Baraka #10: Kuandaliwa Kuelekea Ukuu	51
MAREJEO	53
Vitabu Vingine	54

Nasaha Za Wasomaji

*Ni neema ya pekee kwako msomaji (kama mimi) kupata fursa ya kusoma kitabu hiki. Mimi nimefanikiwa kusoma baadhi ya vitabu vya mwalimu Adriano Mkonda, kimojawapo ni kile cha **Nguvu ya wazo**. Ni mengi mazuri nimejifunza kutoka katika neno wazo. Kitabu hicho kimenipa mabadiliko makubwa na kimenifanya nijione mtu wa tofauti sana. Shukrani zangu za dhati ziende kwa mwandishi wa vitabu hivi. Ahsante.*

Yasinta Godfrey Gregory
Dar-es-salaam Tanzania

Nimefanikiwa kusoma vitabu vifuatavyo Utoaji unaomgusa Mungu, Sayansi ya muda, Nidhamu binafsi, Kusudi 101, Maono 101, Ulimwengu wa mitandao, Nguvu ya wazo na vingine naendelea navyo. Kwa ujumla naweza kuviita vitabu hivi “vitabu vya nuru”. Ndugu msomaji pata muda soma vitabu hivi kwani vitakusaidia. Mungu akubariki mwandishi.

Mchungaji Petro Kilamlya
Njombe-Tanzania

Ninamshukuru Mungu kwa ajili ya DITRA Global na Mbeba maono wake, mwalimu Adriano Mkonda. Hii ni sehemu sahihi ya kujichotea maarifa yatakayokujenga kimwili na kiroho. Hakika nimejengwa na kubadilishwa. Mimi ni mtu mwingine.

Scholastica Lunyonga
Iringa-Tanzania

TABARUKU

Kwa mtu yeyote anayetumika chini ya maono ya mtu/watu wengine,

Kwa watu wanaotumika chini ya huduma, taasisi, makampuni na asasi zinazomilikiwa na watu wengine,

Kitabu hiki kiwe sababu ya kila mmoja kutambua kuwa kuna baraka za kutumika chini ya maono na huduma za watu wengine. Naam, baraka hizo zikaambatane na kila mmoja kwa kadiri ya utumishi wake.

SHUKRANI

Shukrani kwa;

Baba yangu wa mbinguni, mwanzilishi na mkamilishaji wa kazi hii. Ninamrudishia yeye sifa na utukufu wote.

Walezi wangu wa kimwili (kwa nyakati mbalimbali), ambao wamewekeza mengi kwangu na kwa malezi yao nipo hivi nilivyo leo.

Askofu Agnell Mguluka na Mama Askofu Agness Mguluka, kwa kuachilia fursa ya mimi kutumika chini ya maono yao. Zaidi kwa malezi yao ya kiroho na kihuduma.

Mama Askofu Peter Shani kwa kunitia moyo katika utumishi wangu na zaidi kwa kukubali kuandika dibaji nzuri ya kitabu hiki.

Yasinta Godfrey Gregory, Mchungaji Petro Kilamlya na Scholastica Lunyonga kwa nasaha zao.

Rafiki yangu na mtenda kazi pamoja nami Deogratius Evord kwa kuandaa jalada bora la kitabu hiki na kusaidiana nami kukamilisha kazi hii.

Wewe msomaji kwa kuchagua kujifunza “Baraka za kutumika chini ya watu wengine” kupitia kitabu hiki. Ahsante sana.

DIBAJI

Suala la kukaa chini ya mamlaka ya watu wengine au kutumika chini ya wengine limekuwa gumu sana kueleweka kwa watu wa kizazi cha sasa hasa vijana.

Wengi wanaamini wanaweza kufanikiwa wao wenyewe na kwamba kutumika chini ya wengine ni kama kupoteza muda, kulaza maono yao au kupoteza masilahi ambayo pengine wangepata moja kwa moja.

Wachache wanaweza kutumika chini ya wengine kwa muda mfupi tu na wakiona matokeo fulani ya utumishi wao wanajikata na kuanza kujitegemea hata kama katika uhalisia hawakupaswa kuanza kujitegemea. Haya tunayashuhudia kila iitwapo leo.

Mpendwa (hasa kama wewe ni kijana) tambua kuwa kuna faida (baraka) nyingi katika kukaa na kutumika chini ya watu wengine hasa wale ambao Mungu amewaweka ili kupitia wao uanze utumishi wako. Kaa chini yao hadi watakapokufanyia **“send off”**, kwa kufanya hivyo utakuwa na mafanikio makubwa katika maisha yako.

Mimi na mume wangu tumetumika chini ya wachungaji wetu wa maeneo tofautitofauti kwa muda mrefu na tulianza kama walimu wa neno la Mungu tu. Baadaye tukapewa tawi (kanisa la mahali pamoja), tukaendelea tukapewa Parishini na

sasa tupo ngazi ya uaskofu wa jimbo (misheni). Tunaendelea kwa unyenyekevu kwa walio juu yetu ngazi kwa ngazi na tunamuona Mungu akitupigania mnoo.

Kipekee nimeguswa sana na kile ambacho Mungu ameweka ndani ya kijana wangu Adriano Mkonda ambaye nimemfahamu kwa muda sasa kupitia huduma yake ya kufundisha pamoja na uandishi wa vitabu.

Kwa namna ya ajabu Mungu amependa kuifunua siri ya **“Kutumika chini ya watu wengine”** (kama nilivyojaribu kugusia kidogo) ndani ya mtumishi wake ambaye kwa unyenyekevu ameamua kuiandika katika kitabu hiki ili wengi tuielewe katika upana wake.

Tafadhali soma kitabu hiki, ninaamini kitakusaidia. Naam, kama utaamua kuyaishi maudhui yaliyofunuliwa ndani yake hakika hautakuwa mtu wa kawaida.

Mungu akubariki

Mama Askofu Peter Shani
Free Petecostal Church Of Tanzania (FPCT)
Tabora-Tanzania

UTANGULIZI

Kila Kitu Huanzia Chini Ya Kitu Kingine

Kama utachunguza kwa umakini utagundua kuwa karibu kila kitu huanzia mahali fulani, hakuna kitu ambacho huanza pasipo msingi wa kitu kingine. Hii ni kanuni ya asili katika uumbaji wote wa Mungu.

Kwa mfano, mimea huanzia ardhini. Majengo ya mitindo mbalimbali huanza na msingi. Mabwawa, mito, maziwa, n.k huanza na chemchemi. Mtoto huanzia kwa mzazi. Mwanafunzi huanzia kwa mwalimu na tena mwalimu huanza kama mwanafunzi. Na mifano mingine mingi.

Kanuni Muhimu

“Kila kitu huanzia chini ya kitu kingine”. Hii ni kanuni muhimu sana ambayo kama haitaeleweka itakuwa vigumu sana kwa ulimwengu kushuhudia mafanikio ambayo Mungu aliyakusudia kwa uumbaji wake tangu awali.

“Kila kitu huanzia mahali fulani, hakuna kitu ambacho huanza pasipo msingi wa kitu kingine.”

Kwa kukosa ufahamu wa kanuni hii muhimu watu wengi wamepishana na baraka zao na matokeo yake wengi

wanayatafuta mafanikio kwa nguvu kubwa sana, hali wasingepaswa kutumia nguvu kubwa kiasi hicho.

Ili Ufikie Mafanikio Kwa Urahisi

Kama ili mbegu ize inahitaji kujitiisha chini ya ardhi. Kama ili ghorofa liinuke lazima lijitiishe chini ya msingi. Kama ili tunda likomae lazima lijitiishe kwa tawi...

Hivyo ndivyo ilivyo kwa mwanadamu (wewe) pia. Kuna mafanikio huwezi kuyapata kama hutakaa na kujitiisha chini ya watu wengine. Kuna viwango hutafika kama hutakubali kuanza kwa kuwatumikia watu wengine. Hili ni jambo muhimu tena muhimu sana kulielewa.

“Kuna mafanikio huwezi kuyapata kama hutakaa na kujitiisha chini ya watu wengine.”

Unaweza kusema kwani ni lazima kuanzia chini ya watu wengine au kutumika chini ya wengine? Jibu laweza kuwa si lazima. Lakini ni muhimu kufahamu kuwa **kama unataka kuifikia hatima yako kwa urahisi na kwa haraka basi njia rahisi ni kwa “kutumika chini ya watu wengine”.**

Mimi ni shuhuda mzuri wa hiki ninachokisema na ndiyo maana nimepata mzigo wa kuandika kitabu hiki ili na wengine pia (ukiwepo wewe msomaji) wajue kuwa kuna baraka katika kutumika chini ya watu wengine.

“Kuna baraka katika kutumika chini ya watu wengine.”

Baraka Ni Halisi

Ndani ya kitabu hiki utajifunza baraka 10 za kutumika chini ya watu wengine ambazo mimi nimejifunza kutoka kwa watu 5 muhimu (important characters) wa Biblia. Nimeyaelewa haya baada ya kuwekeza muda mwingi kujifunza kwa kina maisha ya watu hawa.

Watu hao ni Yoshua chini ya Musa, Ruthu chini ya Naomi, Elisha chini ya Eliya, Timotheo chini ya Paulo na mwisho na kwa umuhimu, Yesu chini ya Yohana Mbatizaji.

Baada ya kujifunza maisha ya watu hawa (na ya wengine wengi katika ulimwengu wetu wa sasa) katika kina chake, niliamua kubadili mbinu za namna ya kuielekea hatima yangu...

Nilianza kutumika chini ya watu wengine, chini ya walezi wangu (ndugu wa damu), mchungaji wangu (baba yangu wa kiroho na kihuduma, my mentor), chini ya kanisa langu, chini ya taasisi (nilipoajiriwa), n.k. Na ninaendelea kufanya hivyo hata sasa.

“Kuna viwango hutafika kama hutakubali kuanza kwa kuwatumikia watu wengine.”

Ni kipindi kifupi tangu nilipofanya maamuzi hayo na hakika nimeshuhudia baraka nyingi kama ambavyo nimeamua kushiriki baadhi ya hizo katika kurasa chache za kitabu hiki.

Na jambo la kushangaza zaidi ni kwamba kadiri ninavyoedelea kutumika chini ya watu wengine ndivyo ninavyoshuhudia milango ikifunguka kwa ajili ya hatima ambayo Mungu aliikusudia katika maisha yangu (sina namna nzuri ya kueleza, Roho akufunulie zaidi).

Kwa machache haya hali mengi yakitarajiwa, ni imani yangu kwamba kitabu hiki kitakupa mtazamo mpya kama ilivyofanyika kwangu na zaidi sana kitakuwa sababu ya wewe kuufikia ukuu uliokusudiwa na Mungu kwa urahisi na tena kwa haraka.

NIMEKUOMBEA

Adriano Mkonda

Agosti 2023

Dhana Ya Kutumika Chini Ya Watu Wengine

“Lakini haitakuwa hivyo kwenu; bali mtu anayetaka kuwa mkubwa kwenu, atakuwa mtumishi wenu,”

- Marko 10:43

Msingi wa ukuu ni utumishi. Na kama ni utumishi basi ni utumishi wa kuwatumikia wengine. Kuna namna nyingi za kuwatumikia wengine, kitabu hiki kitajikita hasa katika utumishi wa kutumika chini ya watu wengine.

“Kutumika chini ya watu wengine ni hali ya kukubali kwa hiari kujitoa, kujitiisha na kufanyia kazi maono ya watu wengine.”

Neno la kiingereza **“Submission”** ni msingi mzuri wa kuelewa maana ya kutumika chini ya watu wengine. Neno hili ni muunganiko wa maneno mawili; **“Submit”** lenye maana ya **“weka chini ya”** na **“mission”** lenye maana ya **“utume/maono”**. Hivyo tunaweza kuongeza kwa kusema;

“Kutumika chini ya watu wengine ni kukubali kwa hiari kuyaweka maono yako chini ya maono ya watu wengine kwa njia ya kuwatumikia.”

Unaweza kutumika chini ya maono ya mtu kwa mfano, mzazi, mlezi, kiongozi, mchungaji, meneja, rafiki, n.k. Pia

unaweza kutumika chini ya maono ya serikali, shirika, taasisi, kampuni, asasi, huduma (za kiroho), n.k. Zote hizi ni namna za kutumika chini ya wengine.

Msingi Wa Ukuu Ni Utumishi

Kuna siri kubwa sana nyuma ya utumishi hasa wa kutumika chini ya watu wengine ambayo watu wengi hawajui. Watu wengi hutafsiri kutumika chini ya watu wengine kama utumwa na matokeo yake wengi hupishana na siri hii kuu.

Katika **Marko 10:43-44**, Yesu anatambulisha siri iliyositirika katika utumishi, ambayo ni **“ukuu (greatness)”** (viwango vya juu alivyokusudiwa mtu na Mungu). Kila mmoja hutamani kuwa mkuu lakini si kila mtu hutamani kuwa mtumishi ambayo ndiyo njia kuu ya kuufikia ukuu (sawa na maandiko).

Tunapotumika chini ya watu wengine tunajiungamanisha na baraka ambazo zitatusaidia kuufikia ukuu ambao Mungu alitukusudia tuufikie tangu awali. Hii ndiyo siri unayopaswa kuijua kama unataka kuufikia ukuu wako.

“Kutumika chini ya watu wengine si utumwa bali ni dalaja la kuelekea ukuu.”

Sasa unakaribishwa kujifunza baraka 10 zitakazokusaidia kuufikia ukuu wako (hatima yako) kwa urahisi, kutoka kwa watu muhimu wa Biblia na watu wengine.

Mungu akujalie wepesi kwa kadiri ya shauku yako

Baraka #1

Kupata Jina (Utambulisho)

Heri kuchagua jina jema kuliko mali nyingi; Na neema kuliko fedha na dhahabu.

- Mithali 22:1

Utambulisho ni hitaji la kila mtu. Nakumbuka nikiwa nasoma shule ya msingi na sekondari kuna wakati karibu kila siku mwalimu wa darasa alikuwa anakuja na kitabu cha orodha ya mahudhurio (attendance) na aliita jina la kila mwanafunzi na ulikuwa wajibu wa kila mmoja kuitika.

Nakumbuka, karibu mara zote mwalimu alipokuwa anaita majina, sikuweka mkazo kusikiliza majina ya watu wengine (hata kama yalikuwa mazuri kuliko langu). Nilisubiri tu kusikia jina langu (hali ambayo nadhani ilikuwa kwa kila mwanafunzi).

“Utambulisho ni hitaji la kila mtu.”

Jina langu lilikuwa la muhimu kuliko jina la yeyote, na mara zote nilijisikia vizuri kulisikia. Kwa upande mwingine ningejisikia vibaya kama mwalimu angelisahau au kulitaja vibaya jina langu.

Uzoefu huu umenipa kujifunza umuhimu wa utambulisho. Kila mmoja kwa asili ameumbwa akiwa na hitaji la kutaka kutambuliwa (tafakari).

Ukweli Kuhusu Jina (utambulisho)

Kila mmoja hutamani kutambuliwa lakini si wote wajuao namna nzuri ya kupata utambulisho mzuri (jina jema). Na hili ni tatizo kubwa la ulimwengu wetu wa sasa.

Ukweli ni kwamba utambulisho ni zaidi ya kuwa na jina ulilopewa na wazazi wako ulipozaliwa. Kuna jina ulipewa na wazazi wako, hilo linakutofautisha wewe na watu wengine.

Naam, kuna jina (brand) ambalo ni matokeo ya vile ulivyo (tabia). Hili haliji kwa bahati au kama ajali, ni jina linalotengenezwa. Ni tunda la tabia yako. Kitabu hiki kitajikita hasa katika aina hii ya utambulisho (jina).

“Tabia yako ndiyo utambulisho wako.”

Jina Jema (Personal Brand)

Katika mithali zake, Sulemani anasema;

Mithali 22:1 *“Heri kuchagua jina jema kuliko mali nyingi; Na neema kuliko fedha na dhahabu.”*

Mithali hii inatupa tafsiri zifuatazo;

- ✚ Kuna jina na “jina jema”
- ✚ “Jina jema” haliji ghafla ni matokeo ya “uchaguzi”

✚ “Jina jema” ni zaidi ya mali nyingi (utajiri)

✚ Kuna heri katika kuchagua “jina jema”

Moja kwa moja utagundua kwamba jina linalozungumzwa hapa, “jina jema” si jina kama hilo ulilopewa na wazazi wako. Bali ni jina kwa maana ya **“Tabia (character)”**

Jina linalokuja kwa msukumo wa tabia ya mtu, ambayo yeye mwenyewe anaijenga kwa kipindi fulani. Lugha inayotumiwa na wengi ni **“Personal brand”**. Swali ni je! Unawezaje kuchagua jina jema?

Kuchagua “Jina Jema” (Developing Your Brand)

Zipo njia nyingi za kutengeneza jina (brand), lakini njia rahisi na ya haraka ni kwa kutumika chini ya watu wengine. Watu wengi hasa vijana wanasumbuka huku na kule wakitafuta majina. Kila mmoja anajitangaza kadiri awezavyo kwa mitandao na kila mbinu lakini wachache wanafanikiwa.

Kitabu hiki kinataka kutuonyesha mahali bora pa kuanzia na si pengine bali kwa kuanzia chini ya wengine. Tutajifunza kwa watu kadhaa wenye majina makubwa na namna walivyoyapata. Tuanze na

Yoshua

Hesabu 13:16: *Hayo ndiyo majina ya hao watu waliotumwa na Musa waende kuipeleleza nchi. Na*

huyo Hoshea mwana wa Nuni, Musa akamwita jina lake Yoshua.

Yoshua ambaye hapo awali aliitwa Hoshea. Biblia inasema alikuwa mtumishi wa Musa tangu ujana wake **(Hesabu 11:28, Yoshua 1:1).**

Hii inatupa tafsiri kwamba Yoshua aliyatoa maisha yake kuyatumikia maono ambayo Mungu aliyaweka ndani ya Musa.

Katika uzoefu huu wa kitumishi Yoshua anapata baraka ya kwanza (sawa na kitabu hiki) ya kutumika chini ya Musa, kupata jina Yaani YOSHUA.

Jina “Hoshea” (jina lake la kwanza) lina maana ya “Wokovu”, lakini jina “Yoshua (alilopewa na Musa) lina maana ya “Bwana ni wokovu” (Jipe sekunde chache za kutayatafakari majina haya).

Ukisoma Biblia utagundua jina Yoshua ni jina maarufu sana kuliko Hoshea. Jina hili linabeba hadi utambulisho wa kitabu kimojawapo cha Biblia “kitabu cha Yoshua”. Lakini lilipatikana kwa utumishi uliotukuka wa muhusika chini ya Musa.

“Jina ni tunda la tabia ambayo haiji kama bahati wala ajali bali inajengwa katika kipindi fulani cha Muda.”

Mungu alikuwa anataka ndani ya Yoshua ambaye alijua atawachukua wana wa Israeli na kuwafikisha katika nchi ya ahadi baada ya Musa ujengeke mtazamo (tabia) kwamba Mungu ndiye sababu ya wokovu wao.

Ukisoma vizuri kitabu cha Yoshua utaona jinsi tabia ya utegemezi kwa Mungu inavyojidhihirisha kwa Yoshua. Na kwa hilo tu Yoshua anakuwa sababu ya wana wa Israeli kushinda karibu kila mahali na hatimaye kuingia katika nchi ya ahadi. Lakini yote yalianza kwa Yoshua kukaa chini ya Musa.

.....

Kuna tabia ambazo zitazaliwa ndani yako kama tu utachagua kukaa na kutumika chini ya watu wengine. Na mwanzoni unaweza kuona kama za kwaida lakini mwisho wa siku zinaweza kukupa jina kubwa sana kama Yoshua.

**“Usihangaikie jina, hangaika kutumika
kwa uaminifu chini ya wengine na jina
litakuwa matokeo ya utumishi wako.”**

Ruthu

Kitabu cha Ruthu kinaelezea kwa kina maisha ya mwanadada Ruthu, ambaye kwa hiari yake alichagua kuambatana na Naomi (**Ruthu 1:16-17**), baada ya shida zilizowapata.

Mtu ambaye alikuwa amepoteza kabisa tumaini la hatima yake, mtu aliyetoa kwao na kwenda kuishi ugenini, je! Unaweza kutegemea mambo ya tofauti kwake? Kiuhalisia ni hapana. Lakini kwa kukaa chini ya Naomi Ruthu anajipatia utambulisho unamsaidia kuufikia ukuu. Biblia inasema;

Ruthu 3:11: *Basi, mwanangu, usiogope; mimi nitakufanyia yote uyanenayo; kwa maana mji wote pia wa watu wangu wanakujua ya kwamba u mwanamke mwema.* (Maneno ya Boazi, ambaye baadaye alikuwa mumewe).

“U mwanamke mwema” tabia hii inazaa utambulisho wa Ruthu na anafahamika na watu wote wa mazingira ya ugenini. Watu hawaishii tu kumjua kama Ruthu, bali kama “mwanamke mwema”, tabia ambayo baadaye inamuinua na kumpeleka katika ukuu.

Je! wajua kuwa jina Ruthu ni miongoni mwa majina yaliyohusika katika uzao wa mfalme Daudi (**Ruthu 4:18-22**) na zaidi sana uzao wa Yesu Kristo (**Mathayo 1:5-6**)? Lakini yote haya yalianza kwa Ruthu kutumika chini ya Naomi.

Inawezekana Kuwa Na Jina Kuu

Haijalishi asili yako, elimu yako, taifa lako, rangi yako, unavyotafsirika na watu wengine, n.k. Ukweli ni kwamba unaweza kuwa na jina kuu, kama utachagua kuanzia chini ya wengine.

Umehangaika sana kutengeneza jina la taasisi yako, kampuni yako, asasi yako, maono yako n.k. Nikutie moyo kwamba bado una nafasi ya kufanya vizuri zaidi kama tu utachagua kuanza kwa kutumika chini ya maono ya wengine.

Ni suala la muda tu. Tafuta Musa wako, tafuta Naomi wako, kubali kukaa chini yake na matokeo utaanza kuyashuhudia kama Yoshua na Ruthu walivyoyashuhudia. Kumbuka;

“Jina lako ni kama dhahabu iliyofichwa chini ya udongo, wanahitajika watu watakaoichimba, watakaoisafisha, watakaoing’arisha na kuiweka sokoni tayari kwa mauzo.”

Na hao si wengine bali ni watu utakaokubali kukaa chini yao, kutumika kwa bidi na kwa uvumilivu chini ya maono yao.

Mungu akujalie neema ya kuyaelewa haya na kuyaishi.

NIMEKUOMBEA

Baraka #2

Kupata Kibali Cha Kiungu

“Ndivyo utakavyopata kibali na akili nzuri, Mbele za Mungu na mbele ya mwanadamu.”

- Mithali 3:4

Kibali cha kiungu ni upendeleo au hali ya kukubalika ambayo mtu anaipata kwa msukumo wa nguvu ya Mungu. Kibali ni kitu cha muhimu sana katika maisha.

Wakati mwingine kuna mambo hayawezi kutokea katika maisha yetu kama tutakosa kibali hasa kile kinachotoka kwa Mungu mwenyewe. Kwa lugha nyingine tunaweza kusema “kibali cha Mungu ni ufunguo wa mafanikio ya kweli, pasipo hicho si rahisi kufanikiwa.”

Neema na Kibali

Neema na kibali ni maneno ambayo ni kama yana maana moja lakini katika uhalisia yana tofauti na ni muhimu kuelewa tofauti za maneno haya.

Neema ni upendeleo ambao mtu hupewa pasipo kutarajia tena pasipo gharama yoyote, huku kibali ni upendeleo ambao ili utokee lazima kuwepo na kuwajibika.

Tofauti na neema ambayo yeyote anaweza kuipata sawa na vile Mungu atakavyo, kibali huja kwa kutegemea mazingira ambayo yametengenezwa na anayekipokea.

Zaidi Kuhusu Kibali

Mungu anamwambia kaini, “**Kama ukitenda vyema, hutapata kibali?**” (Mwanzo 4:7). Kwa lugha rahisi ni kwamba kaini alipaswa kuwajibika kwa kutenda vema ndipo apate kibali kutoka kwa Mungu.

“Kibali ni tunda la wajibu, hakuna wajibu hakuna kibali.”

Tunaweza kujifunza zaidi kwa kusoma;

Mitahali 3:3-4: *Rehema na kweli zisifarakane nawe; Zifunge shingoni mwako; Ziandike juu ya kibao cha moyo wako. 4 Ndivyo utakavyopata kibali na akili nzuri, Mbele za Mungu na mbele ya mwanadamu.*

Mstari wa 3 unaonyesha majukumu (wajibu) ambayo yakitendeka ipasavyo matokeo yake yatakuwa ni kibali kama unavyoeleza mstari wa 4. Ni hivi, kibali ni tunda la wajibu hakuna wajibu hakuna kibali (soma Biblia vizuri).

Kibali Na Kutumika Chini Ya Watu Wengine

Hakuna mtu ambaye hapendi kibali cha Mungu katika maisha yake. Karibu kila mtu anapenda kibali cha Mungu, jambo la ajabu ni kwamba si wote wapo tayari kuwajibika ipasavyo ili kukipata kibali hicho.

Kuna namna nyingi tunaweza kuwajibika ili kupata kibali cha Mungu katika maisha yetu lakini njia rahisi ni kwa

kutumika chini ya watu wengine. Tujifunze kwa kina zaidi kwa maisha ya Ruthu.

Katika **Ruthu 1:16-17**, tunaona Ruthu anachagua kuambatana (wajibu) na Naomi. Haishii hapo, anatoka kwao na kwenda nchi ya ugeni, nyumbani kwa Naomi. Anaanza maisha ugenini kama binti wa Naomi.

“Karibu kila mtu anapenda kibali cha Mungu, lakini si kila mtu yupo tayari kuwajibika kupata kibali hicho.”

Sura ya 2, inaanza kwa kueleza habari za Boazi ndugu wa mumewe Naomi. Biblia inaendelea kueleza jinsi Ruthu alivyojishusha kwa Naomi kiasi cha kuomba kutumwa (wajibu) kutafuta chakula kwa ajili ya yeye na Naombi.

Naomi anamruhusu na Biblia inasema; *“Basi [Ruthu] akaenda, akaja akaokota masazo kondeni nyuma ya wavunaji; na bahati yake ikamtukia kwamba akaifika sehemu ya shamba iliyokuwa mali yake huyo Boazi, ambaye alikuwa wa jamaa yake Elimeleki. (Ruthu 2:3).*

Hii ndiyo maana ya kibali cha Kiungu. Ruthu hakuelekezwa lilipo shamba la Boazi lakini kwa utii wake na moyo wake wa kutumika chini ya Naomi, Mungu anaachilia kibali kwake kwa namna ambayo hata Ruthu mwenyewe hakuweza kueleza. Biblia inasema;

Ruthu 2:10 *Ndipo aliposujudia[Ruthu], akainama mpaka nchi, akamwambia[Boazi], Jinsi gani nimepata kibali machoni pako, hata ukanifahamu, mimi niliye mgeni?*

Ni Wewe Tu Kutumika Chini Ya Wengine

Kama ilivyokuwa kwa Ruthu, kama ukijitoa kutumika chini ya wengine utaanza kushuhudia jinsi kibali cha Mungu kitakavyoanza kudhihirika katika maisha yako.

Inawezekana wewe ni mchanga katika huduma yako au haujui mambo mengi katika fani yako, kama Ruthu alivyokuwa mgeni. Kama utaanzia chini ya wengine kwa uaminifu kibali cha Mungu hakiwezi kukuacha.

Utafika maeneo ambayo hukuwahi kufika, utafanya mambo ambayo kwa akili zako hukuwahi kuwaza kuyafanya kwa sababu kibali cha Mungu kitakuwa juu yako.

Mwaka 2018 nilianza rasmi kutumika chini ya kanisa langu kama mwalimu wa shule ya jumapili. Sikuwa najua kama kufundisha tu shule ya jumapili kungekuwa sababu ya mimi kupata nafasi ya kufundisha vyuoni, makanisani, makongamano, kupata ajira na zaidi kuwafikia watu wa mataifa mengi kwa njia ya vitabu ninavyoviandika.

Kuna kibali cha ajabu ambacho Mungu huachilia kwa wote wanaojitoa kutumikia kwa uaminifu maono ya watu wengine. Ni wewe tu kuchagua kutumika chini ya wengine.

Mungu akusaidie

Baraka #3

Muunganisho Wa Kiungu

“...Na bahati yake ikamtukia kwamba akaifika sehemu ya shamba iliyokuwa mali yake huyo Boazi, ambaye alikuwa wa jamaa yake Elimeleki.”

- Ruthu 2:3

Muunganisho wa kiungu (divine connection) ni mojawapo ya baraka kubwa ambayo watu wote wanaotumika chini ya watu wengine huipata. Hebu tujifunze kwa kina.

Ilikuwa tarehe 15 mei 2018, nikiwa nafuatilia mafundisho ya mchungaji E.A Adeboye akiwa anafundisha somo la “Muunganisho wa kiungu (Divine Connection) katika huduma ya Open Heavens Daily Devotional.

Nilijifunza mambo mengi katika mfululizo huo, lakini niliguswa sana na maana ambayo mchungaji Adeboye aliitoa. Alisema;

“Muunganisho wa Kiungu: ni namna mtu anavyounganishwa na vyanzo ambavyo vitamsaidia kuifikia hatima yake kwa haraka.”

Kila mwanadamu alikusudiwa kufikia hatima fulani katika maisha yake. Ili kuifikia hatima hiyo anahitaji msaada wa

watu wengine. Kwa mfano wazazi, walimu, marafiki, viongozi wa kiimani, n.k.

Kuna watu unawahitaji ili kuifikia hatima yako na kwamba kama utawakosa unaweza usiifikie kabisa hatima yako au ukafika lakini kwa kuchelewa pamoja na taabu nyingi sana.

“Hakuna hatima inayofikiwa pasipo mchango wa watu wengine.”

Kuna watu wanakuja moja kwa moja kwenye maisha yako na kuna wengine hawaji moja kwa moja. Maana yake kuna namna lazima ifanyike ili ukutane nao. Na hapa ndipo ulipo mtihamu wa wengi.

Kuunganishwa Kupitia Watu Wengine

Njia mojawapo ya kukutana na watu hao ni kwa kutumika chini ya watu au maono ya watu wengine. Tutajifunza kwa kina kwa mifano hai, kwa kuanza na mfano wa Ruthu.

Hapo awali niligusia kwamba Ruthu ni miongoni mwa wanawake muhimu sana katika Biblia kwa sababu yeye alihusika katika uzao wa Daudi na kwa kusema hivyo alihusika moja kwa moja katika uzao wa Yesu Kristo. Huyu hakuwa mtu wa kawaida.

Ni kwamba Mungu alikusudia tangu awali Ruthu ahusike katika ukombozi kwa kuwa mama wa watu ambao mwisho

wa siku wangukuwa sababu ya kuzaliwa kwa mkombozi na tunaona jambo hili lilifanikiwa.

Nafasi Ya Naomi

Lakini Ruthu ukizingatia uhalisia wake, asili yake, taifa lake, na maisha yake kwa ujumla utagundua kabisa asingeweza kufikia hatima hii kuu pasipo mchango wa Naomi.

Naomi alikuwa mama wa kawaida sana, mama wa hali ya chini, mama aliyekuwa amekataa tamaa lakini hiyo haikumuondoa katika mstari wa yeye kuwa sababu ya Ruthu kuifikia hatima yake.

“Nyuma ya wale utakaokubali kutumika chini yao kuna mtandao wa watu ambao unawahitaji katika safari ya kuifikia hatima yako.”

Kwa unyenyekevu Ruthu anakubali kuambatana na Naomi pasipo kujali hali yake. Ni kama ndani yake alijua kuwa hatima yake ilikuwa mikononi mwa Naomi.

Kama tulivyosoma katika baraka ya 2, kwa kukubali kuambatana na kutumika chini ya Naomi. Ruthu anaunganishwa na Boazi kwa namna ya ajabu sana.

Na kwa namna isiyo ya kawaida Boazi anamuoa Ruthu na kwa pamoja wanaandika historia katika uzao wa mfalme wa mfalme Yesu Kristo.

Nyuma ya Naomi alikuwepo Boazi ambaye Ruthu asingeweza kukutana naye kama asingekubali kwa hiari kutumika chini ya Naomi. Tafakari kwa kina.

Kuna watu unawahitaji katika safari ya maono yako na pengine umekuwa ukiwatafuta sana. Ukweli ni kwamba huwezi kukutana nao mpaka utakapokubali kuanzia chini ya watu wengine.

Ushuhuda Wangu

Baada ya kuhitimu chuo kikuu (shahada ya kwanza) mwaka 2019 nilimfuata mchungaji wangu na kumuomba awe mlezi wangu (my mentor) na kwa kusema hivyo nilikuwa nimechagua kutumika chini ya maono yake moja kwa moja.

Kwa kutumika chini yake nimeunganishwa na watu wengi waliochangia na wanaoendelea kuchangia hatima yangu hata sasa. Hawa ni watu ambao kama ningewatafuta kwa juhudi zangu hakika nisingeweza kuwapata.

“Kuna watu unawahitaji katika safari ya maono yako na kamwe huwezi kuwapata mpaka utakapoamua kutumika chini ya maono ya wengine.”

Kwa mfano, mwaka 2021 mchungaji wangu aliniunganisha na mtu mmoja ambaye kupitia huyu nimefanikiwa kusoma

diploma ya Thiolojia katika masuala ya uongozi wa Kikristo na maendeleo ya jamii.

Mwaka huohuo niliunganishwa na watu wa huduma ya Christ for all nations (CfaN) inayoongozwa na Daniel Colenda mrithi wa maono ya Reinhard Bonnke. Kwa miezi zaidi ya 3 nilifanya kazi ya injili na watu wa mataifa mbalimbali jambo ambalo lisingekuwa rahisi kwa juhudi zangu.

Mwanzoni mwa mwaka huu (2023) nilipata kazi katika shirika liitwalo “Serving Our Neighbour (SON-Tanzania)” na walioniajiri walinifahamu kupitia mchungaji wangu na kanisa langu na si kwa sababu ya elimu yangu. Ninaamini kuna kitu unajifunza kuhusu kutumika chini ya watu wengine.

Jaribu Kufikiri...

Tungesoma nini kuhusu Ruthu kama angechagua kuachana na Naomi kama alivyofanya ndugu yake Orpa? Bila shaka tusingekuwa hata na kitabu cha Ruthu katika Biblia, kama ambavyo hakuna taarifa za zaidi za Orpa.

Kingetokea nini katika uzao wa Yesu kama Ruthu asingekubali kuambatana na Naombi. Bila shaka Biblia ingesomeka kivingine kabisa. Lakini kwa maamuzi ya Ruthu, leo tuna historia yake ambayo kamwe haiwezi kufutika.

Inawezekana...

Inawezekana kukutana na watu unaowahitaji katika safari ya kuielekea hatima yako. Ni wewe tu kuchagua kukaa chini ya wale ambao Mungu amekupanda kwao kwa uvumilivu mpaka utakapoiona njia.

Mungu akupanue zaidi kiufahamu katika haya

Ni maombi yangu kwako

Baraka #4

Kutahiriwa (Kutengenezwa)

“Paulo akamtaka huyo afuatane naye, akamtwaa akamtahiri kwa ajili ya Wayahudi waliokuwako pande zile; kwa maana wote walijua ya kuwa babaye ni Myunani.”





- Matendo ya Mitume 16:3

Unaweza kujiuliza je! kutahiri pia ni baraka ambayo mtu anaweza kuipata kwa kutumika chini ya watu wengine? Ndiyo hii ni mojawapo ya baraka tena ya muhimu sana. Labda tuanze kujifunza maana ya kutahiri.

Katika utamaduni wa kawaida kutahiri ni jambo ambalo linawahusu wanaume. Katika mtazamo huohuo tunaweza kujifunza jambo hili kama baraka sawa na mlengo wa mada yetu.

Kwa kawaida kutahiri huusisha kukata sehemu ya kiungo cha mwili (wa mwanaume) ambayo kama itaendelea kuwepo inaweza kuathiri muonekano na utendaji kazi wa kiungo husika.

Baadhi ya kweli Kuhusu Kutahiri

-  Kutahiri huusisha kukata (kuondoa)
-  Kutahiri huamabatana na maumivu
-  Lengo la kutahiri si kuumiza bali kutengeneza
-  Hakuna anayeweza kujitahiri mwenyewe

✚ Kiungo kilichopaswa kutahiriwa kisipotahiriwa hupoteza ufanisi wake.

Kutahiri Katika Mchakato Wa Kufikia Hatima

Katika safari ya kuelekea hatima yoyote mchakato uitwao kutahiri (kutengeneza) ni wa muhimu sana. Ni mchakato ambao wakati mwingine huambatana na maumivu lakini mwishowe huambatana na matokeo makuu.

“Huwezi kuifikia hatima yako kikamilifu pasipo kupita katika mchakato wa matengenezo (kutahiriwa).”

Mchakato huu ni muhimu kwa sababu kwa asili karibu kila mtu huwa na vitu ambavyo kama vitaachwa pasipo kukatwa vitamfanya asifikie hatima yake katika ukamilifu.

Vitu hivyo ni kama vile baadhi ya tabia ambazo mtu hapaswi kuwa nazo kama anataka kweli kuifikia hatima yake. Kwa mfano kiburi, majivuno, kukosa nidhamu, n.k. Kwa uhalisia huu kutahiriwa ni muhimu.

Nafasi Ya Wengine Katika Mchakato Wa Kutahiri

Ukweli ni kwamba hakuna awezaye kujitahiri mwenyewe. Hii ni kwa sababu mchakato huu huambatana na maumivu, na kama atajitahiri ni wazi kwamba hatafanikiwa kukata vitu vyote visivyotakiwa. Kanuni hii inafanya kazi hata katika safari ya kuelekea hatima zetu.

Hii inatoa tafsiri kwamba tunahitaji msaada wa watu wengine ambao watatutahiri na kutuandaa kwa ajili ya hatima zetu. Hakuna mbadala mwingine.

Watu wote ambao walikubali kupita katika mchakato wa kutengenezwa na watu wengine waliishia kuwa watu wakuu. Ipo mifano mingi sana lakini kwa ajili ya umuhimu wa kitabu hiki tujifunze kwa mfano wa vile Paulo alivyomtahiri kijana wake Timotheo. Maandiko yanasema;

Matendo ya mitume 16:1-3: *Basi [Paulo] akafika Derbe na Listra, na hapo palikuwa na mwanafunzi mmoja jina lake Timotheo, mwana wa mwanamke Myahudi aliyeamini; lakini babaye alikuwa Myunani. 2 Mtu huyo alishuhudiwa vema na ndugu waliokaa Listra na Ikonio. 3 Paulo akamtaka huyo afuatane naye, akamtwaa akamtahiri kwa ajili ya Wayahudi waliokuwako pande zile; kwa maana wote walijua ya kuwa babaye ni Myunani.*

Timotheo alilelewa vizuri kiimani na wazazi wake, bibi yake Loisi na mama yake Eunike (**2Timotheo 1:3-5**) na matokeo yake alikuwa mwanafunzi bora na kwa sifa hizo Paulo alimpenda na akataka kuambatana naye.

Licha ya sifa hizo zote kulikuwa kuna kikwazo nyuma ya Timotheo, alikuwa Myunani hali ambayo ingemfanya asifae katika huduma ya Paulo ambayo kwa sehemu iligusa maisha ya wayahudi.

Ili Timotheo aendane na uhalisia na awe mtu wa kufaa, Paulo aliamua kumtahiri ili awe na sifa za kufanya maeneo yote hata yale ya Wayahudi ambao waliamini katika tohara.

Kuna jambo la muhimu sana la kujifunza hapa. Usidhani kwamba Timotheo hakuumia, aliumia, lakini kwa sababu alitazamia hatima kuu aliukubali mchakato huu muhimu.

“Kusudi kuu la kutahiri si kusababisha maumivu bali kukitengeneza kiungo ili kifae katika makusudi maalumu.”

Matokeo yake tunaona Timotheo anakuwa mtu wa muhimu sana katika huduma ya Paulo na Paulo anajivunia uwepo wake **(Wafilipi 2:19-24)** na zaidi sana yeye mwenyewe anakuwa mtu mkuu.

Kwa mfano, Timotheo alipewa wajibu wa kusimamia makanisa huko Efeso **(1Timotheo 1:3-11)** yaani alikuwa askofu. Si hivyo tu Timotheo anatumwa na Paulo maeneo mengi na tunashuhudia matokeo ya huduma yake.

Unahitaji Watu Watakao kutengeneza

Wewe ni kama Timotheo, kuna tabia uko nazo ambazo hazifai katika safari ya maono yako. Unahitaji watu ambao watashughulika na hizo, kwa sababu wewe mwenyewe hutaweza kuzishughulikia kikamilifu.

Na wakati mwingine unaweza kujiona uko sawa na unatenda kwa ubora lakini ukianza kukaa na kutumika chini yao, wao ndiyo watatambua changamoto zako na taratibu wataanza kuzishughulikia. Ni wewe tu kukuukubali mchakato.

Unahitaji watu ambao kama wakikuambia 1,2,3... sio sahihi unapaswa kuacha unakubaliana nao pasipo ubishi. Watu ambao wakikuambia unapaswa kufanya A, B, C... na hupaswi kufanya X, Y, Z... na ukawa tayari kukubaliana nao. Watu ambao utawasikiliza na kuwatii ukijua kuwa wapo kwa lengo la kukusaidia.

**“Vinginevyo umekubali mchakato wa
kutengenezwa na watu wengine
haitakuwa rahisi kwako kufika mbali.”**

Tafadali lielewe kwa upana jambo hili. Lengo si kukuumiza bali ni kukutengeza. Ukubali mchakato kwani ndani ya huo ndiko kuna kutengenezwa naam, kufikia hatima yako kuu.

Mungu akusaidie

Baraka #5

Kuongezewa Thamani

“Basi wewe oga, ujipake mafuta ujivike mavazi yako, kisha uende kwenye uga; walakini usijionyeshe kwake mtu yule, ila atakapokwisha kula na kunywa.”

- Ruthu 3:3

Kuongeza thamani ni kukifanya kitu kiwe bora zaidi ya vile kilivyokuwa awali. Kwa mfano kama dirisha hapo awali lilikuwa halina vioo, litakapowekewa vioo litakuwa limeongezewa thamani. Litakuwa bora zaidi ya vile lilivyokuwa awali.

Kuongezewa thamani ni moja ya baraka ambayo watu huipata wanapotumika chini ya watu wengine. Watu wote waliotumika kwa uaminifu katika maono ya watu wengine hawakuishia kuwa watu wa kawaida. Hebu tujifunze kwa baadhi ya watu hapa;

Ruthu

Baada ya Naomi kupata taarifa kwamba Ruthu alikutana na Boazi (mtu ambaye alimfahamu) alianza kumtengeneza Ruthu ili awe mtu wa kufaa kwa ajili ya Boazi. Alimuongezea thamani. Biblia inasema;

Ruthu 3:1-3: *Kisha Naomi akamwambia mkwewe, Je! Mwanangu, si vizuri nikutafutie raha, ili upate mema? 2 Basi na huyu Boazi, je! Siye wa mbari yetu, ambaye ulikuwapo pamoja na wasichana wake? Tazama, usiku wa leo atakuwa akipepeta shayiri pale ugani. 3 Basi wewe oga, ujipake mafuta ujivike mavazi yako, kisha uende kwenye uga; walakini usijionyeshe kwake mtu yule, ila atakapokwisha kula na kunywa.*

“Basi wewe oga, ujipake mafuta ujivike mavazi yako...”

Haya si maneno ya kawaida. Ni maneno ya mtu anayeonekana ana upendo wa dhati kwa anayemwambia na anatamani afike mbali katika maisha yake.

Naomi aliamini ndani ya Ruthu kulikuwa na kitu cha pekee ambacho kilipaswa kuongezewa tu thamani ili kiwe sokoni. Na kwakweli alifanikiwa, mwisho wa siku tunaona Ruthu anaolewa na Boazi na wanaandika historia.

“Matokeo ya kutumika chini ya wengine ni kuongezewa thamani inayokufanya uwe bora zaidi.”

Timotheo, Yoshua na Elisha

Mfano mwingine ni wa **Timotheo**, Kwa kutumika chini ya Paulo kwa muda mrefu aliishia kuwa mtu mkuu kama nilivyoeleza hapo awali.

Zaidi ya Timotheo, ni **Yoshua** tunaona ubora wa Yoshua hasa tunaposoma kitabu cha Yoshua, vile alivyowaongoza wana wa Israeli hadi nchi ya ahadi kwa kushinda karibu kila

mahali. Yote yalikuwa ni matokeo ya thamani aliyoongezewa kwa kutumika chini ya Musa.

Elisha pia ni mfano bora. Wataalamu wa Biblia wanasema Eliya alifanya miujiza 8 tu lakini Elisha alifanya miujiza 16 (mara mbili). Yote haya yalikuwa ni matokeo ya thamani iliyoongezwa kwake kutokana na vile alivyoambatana na kumtumikia Eliya.

Kaa Chini Ya Waongeza Thamani

Kama unahitaji kuwa bora zaidi katika jambo lolote njia moja ya kufikia lengo hilo ni kwa kujitoa na kutumika chini ya maono ya wengine. Huwezi kuona matokeo papo kwa hapo lakini kadiri utakavyokuwa mnyenyekevu chini ya watu husika ndivyo thamani yako itakavyokuwa inaongezeka vivyo ubora wako.

Ni maombi yangu kwamba Mungu akukutanishe na watu ambao utakaa chini yao na kwa kukaa chini yao awape neema ya kuona kile kilicho ndani yako.

Naam, wasiishie tu kuona lakini wakiongezee thamani na kukiinua kwa ajili ya utukufu wake na kwa manufaa ya ulimwengu wako.

Pokea Moambi haya

Baraka #6

Upako

*“...Elisha akasema, Nakuomba, sehemu maradufu ya roho
yako na iwe juu yangu.”*
- 2Wafalme 2:9

Katika nyakati za leo “upako” limekuwa ni hitaji kubwa la karibu kila mtu na kila mahali. Neno upako limekuwa ni neno linalotajwa mara kwa mara katika nyumba za ibada, vyombo mbalimbali vya habari, mitandaoni, n.k.

Watu wamefika mbali zaidi kwa kutafuta mbinu mbalimbali ambazo kwazo wanaamini wanaweza kuupata upako katika maisha yao ya kila siku. Huu ndiyo ulimwengu wetu.

Ukweli ni kwamba upako si kitu kibaya. Kwa tafsiri rahisi upako ni;

***“Uwepo wa Mungu (Roho Mtakatifu) ndani ya
Mtu ambao unamsaidia kutimiza makusudi ya
Mungu aliyokusudiwa kuyafanya.”***

Au kwa lugha nyingine rahisi tunaweza kusema upako ni;

***“Uwezesho wa kiungu ndani ya mtu
unaomsaidia kukamilisha wito wake.”***

Tunahitaji uwepo wa Mungu ili kwa huo tuweze kumpendeza na zaidi sana kukamilisha makusudi

yaliyomsukuma atuumbe. Sasa swali la muhimu la kujiuliza; ni njia ipi rahisi tunaweza kuitumia kupata upako?

Upako Kwa njia Ya Kuwatumikia Wengine

Tunaweza kuomba pamoja na kutumia mbinu nyingine nyingi lakini mbinu mojawapo ambayo kwayo tunaweza kupata upako maradufu ni kwa kuwatumikia watu wengine.

Biblia inatambulisha mifano ya watu wengi ambao walipokea uwepo mkubwa wa Mungu kwa kuwatumikia watu wengine. Hebu tujifunze zaidi.

Mfano Wa Elisha

Huyu ni mtu ambaye aliacha vyote alivyokuwa navyo na kuambatana na mtumishi wa Mungu Eliya na Biblia inasema alimhudumia yaani, alikuwa mtumishi wa Eliya (**1Wafalme 19:19-21**).

“Tunapotumika chini ya watu ambao Mungu anawaamini tunakuwa katika fursa ya kupokea uwezesho zaidi wa kiungu kupitia wao.”

Akiwa katika mwisho wake, Biblia inasema “*Eliya akamwambia Elisha, Omba kwangu lo lote utakalo nikutendee, kabla sijaondolewa kwako. Elisha akasema, Nakuomba, sehemu maradufu ya roho yako na iwe juu yangu.*” (**2 Wafalme 2:9**)

Hili halikuwa ombi dogo na lilihitaji bidii kubwa kutoka kwa Elisha, na kwa sababu alikuwa na hamu ya hilo, Biblia inaonyesha wazi kwamba Elisha alipokea kile alichoomba “upako maradufu”. Na tunaona jinsi alivyofanya makubwa baada kupokea upako huo.

Mfano Wa Yesu

Kuna viwango vya upako hatuwezi kuvipata mpaka tutakapokuwa chini ya watu ambao Mungu aliwaandaa kwa ajili yetu. Tunaweza kujifunza zaidi kwa Yesu.

Yesu alikuwa Mungu lakini pia alikuwa mwanadamu. Ujio wake hapa duniani ulitanguliwa na ujio wa Yohana Mbatizaji. Hivyo Yohana alikuwa mtu wa muhimu sana katika huduma ya Yesu bila kujali Uungu wake.

Hii ndiyo sababu kabla Yesu hajaanza huduma yake alienda kwa Yohana Mbatizaji ili abatizwe (alikuweli kukaa na kutumika chini ya huduma ya Yohana Mbatizaji). Hata Yohana alipomzuia, Yesu bado alimlazimisha Yohana ili atimize wajibu wake kwa sababu ilikuwa muhimu kwa huduma ya Yesu.

Na matokeo ya Yesu kujitiishi chini ya ubatizo wa Yohana ni kama Biblia inavyosema;

Mathayo 3:16-17: *Naye Yesu alipokwisha kubatizwa mara akapanda kutoka majini; na tazama, mbingu zikamfunukia, akamwona Roho wa Mungu akishuka kama hua, akija juu yake; 17 na tazama, sauti kutoka*

mbinguni ikisema, Huyu ni Mwanangu, mpendwa wangu, ninayependezwa naye.

Viwango Zaidi...

Utashangaa kuona kwamba baada ya Yesu kubatizwa na Yohana Biblia inasema “*Roho wa Mungu akashuka juu yake*”, na huyo akamwongoza kwenda jangwani na katika huduma yake katika ujumla wake. Kuna kitu unajifunza hapa?

“Kuna viwango vya utendaji wa Roho Mtakatifu (upako) utavipata tu kwa kutumika chini ya wengine na si vinginevyo.”

Hivi ni viwango ambavyo hutavipata kwa kuomba, wala kwa kupakwa mafuta unahitaji tu kukaa chini ya watu wengine na kunyenyekea kwao, vinginevyo utakuwa mtu wa kawaida sana.

Ukijifunza kwa umakini maisha ya Yoshua na Elisha, utagundua kuwa kuna namna walikuwa wana upako ambao ulitokana na wale waliokuwa wanawatumikia na kwa huo walifanya makuu. Haukuwa kwa sababu ya juhudi zao.

Unahitaji upako zaidi na huo hutaupata popote isipokuwa kwa kukaa chini ya mamlaka yaw engine na kuwatumikia kwa uaminifu.

Mungu akusaidie kuyaelewa haya

Baraka #7

Uzoefu

“Ila mwajua sifa yake, ya kuwa ametumika pamoja nami kwa ajili ya Injili, kama mwana na baba yake.”

- Wafilipi 2:22

Tunaposema kutumika chini ya watu wengine tunamaanisha kuwa tunakuwa chini ya uangalizi wa watu wenye uzoefu wa muda mrefu.

Hivyo kwa kutumika chini yao inakuwa rahisi kwetu kujifunza kwao na matokeo yake tunakuwa na fursa ya kufanya vizuri zaidi katika maono yetu binafsi.

Kwa kutolitambua hili watu wengi hasa vijana wamekuwa watu wanaofanya vibaya sana katika mambo mengi si kwa sababu labda hawawezi lakini kwa sababu hawana uzoefu na wakati mwingine kwa sababu ya kukataa kuwa chini ya watu wenye uzoefu.

“Uzoefu huambukiza.”

Kama kweli tunataka kufika mbali hatuwezi kukwepa kukaa chini ya watu wenye uzoefu. Hii ni kwa sababu uzoefu huambukiza. Ukikaa chini ya wenye uzoefu na wewe lazima utakuwa mzoefu na pengine utakuwa bora zaidi.

Mfano Wa Yoshua

Biblia inasema alikuwa mtumishi wa Musa tangu ujana wake **(Hesabu 11:28)**. Hii inamaana kuwa Yoshua alikuwa anajua karibu kila kitu ambacho Musa alikuwa anakifanya. Kwa uzoefu huo si ajabu kuona Mungu anamwambia Musa amfanye Yoshua awe mrithi wake.

“Kwa kukaa chini ya wengine utapokea uzoefu utakaokusaidia kwenda kwa wepesi zaidi katika hatima yako.”

Ukisoma vizuri Biblia hasa kitabu ya Yoshua utagundua kuwa Yoshua alikuwa kiongozi bora sana, si kwa sababu aliumba akiwa hivyo, bali kwa sababu alipokea uzoefu wa kiuongozi kutoka kwa Musa kwa miaka na miaka,

Mfano Wa Timotheo

Paulo anawambia wafilipi;

Wafilipi 2:19-22 *Walakini natumaini katika Bwana Yesu kumtuma Timotheo afike kwenu karibu, nifarijiwe na mimi, nikijua hali yenu. 20 Maana sina mtu mwingine mwenye nia moja nami, atakayeiangalia hali yenu kweli kweli. 21 Maana wote wanatafuta vyao wenyewe, sivyo vya Kristo Yesu. 22 Ila mwajua sifa yake, ya kuwa ametumika pamoja nami kwa ajili ya Injili, kama mwana na baba yake.*

Maneno ya Paulo ni maneno ya kuonyesha uhakika kwamba uzoefu alio nao yeye ameumimina vya kutosha ndani ya Timotheo na hivyo vile alivyo yeye ndivyo alivyo Timotheo. Na hakika Timotheo alikuwa mtu bora kwa sababu ya uzoefu alioupata kwa Paulo.

Unahitaji Uzoefu Zaidi

Umekuwa ukijaribu mambo mengi lakini unajikuta unashindwa. Kila biashara unayoianza unaishia njiani, au pengine umejiajiri lakini huoni matunda ya kile unafanya. Kaa chini na jitafakari, pengine umekosa uzoefu.

Kuwa na uzoefu ni muhimu sana katika safari ya mafanikio na njia rahisi ya kupata uzoefu ni kuambatana na watu wenye uzoefu. Tafuta akina Musa na akina Paulo wa kile unachotaka kukifanya, pata uzoefu kwao kwa kukubali kukaa chini yao na kujifunza kwao.

Kwa kufanya hivyo utafanya vizuri zaidi. Chukua ushauri huu na ufanikiwe kwa kadiri ya utakavyoamua kuutendea kazi.

Nimekuombea

Baraka #8

Kupata Mtandao

“Yesu akarudi kwa nguvu za Roho, akenda Galilaya; habari zake zikaenea katika nchi zote za kandokando.”

- Luka 4:14

Kila maono huwa kwa ajili ya mtandao maalumu wa watu. Maono si kwa faida ya aliyeyabeba bali kwa ajili ya kufikia mahitaji ya watu wengine.

Katika mlengo wa mada yetu, wale watu ambao maono yako yamekusudiwa kuwafikia ndiyo huitwa mtandao (Network). Kwa mfano kama wewe ni mfanyabishara utahitaji wanunuaji. Mimi mwandishi nitahitaji wasomaji, mwalimu atahitaji wanafunzi, n.k.

Wakati mwingine tunaweza kuwa na maono lakini tukakosa mtandao wa watu ambao maono yetu yanapaswa kuwafikia. Hili ni tatizo kubwa tena sana.

“Kila maono huwa kwa ajili ya mtandao maalumu wa watu.”

Haya yanatokea hasa katika ulimwengu wetu wa sasa, unakuta mtu ni muimbaji mzuri na ana nyimbo nzuri lakini hakuna mtu anasikiliza nyimbo zake.

Mtu ana mafundisho mazuri katika mitandao ya kijamii lakini hakuna mtu anafuatilia. Hili ni tatizo ambalo linawafanya watu wengi wakate tamaa katika maono yao. Leo tunataka tusaaidiane namna ya kupata mtandao;

Kupata Mtandao Kwa Kutumia Watu Wengine

Tunaweza kujifunza vizuri kwa Yesu. Kama nilivyotangulia kuandika awali, Yesu alikuja nyuma ya Yohana Mbatizaji. Hii inamaanisha kwamba watu walitangulia kumfahamu Yohana Mbatizaji kabla ya Yesu.

Lakini Yohana anatumia ushawishi wake kumtambulisha Yesu kwa watu waliokuwa wanamfuata; Biblia inasema;

Mathayo 3:5,11: *Ndipo walipomwendea Yerusalemu, na Uyahudi wote, na nchi zote za kandokando ya Yordani... [akasema]Kweli mimi nawabatiza kwa maji kwa ajili ya toba; bali yeye ajaye nyuma yangu ana nguvu kuliko mimi, wala sistahili hata kuvichukua viatu vyake; yeye atawabatiza kwa Roho Mtakatifu na kwa moto.*

Ukisoma vizuri utagundua baada ya kusanyiko hili Biblia haitaji tena kusanyiko lolote la Yohana Mbatizaji. Watu wote walianza kumfuata Yesu na hapo ndipo huduma ya Yesu ilipoanza rasmi.

Yesu hakutumia nguvu yoyote kujitangaza alijua hiyo siyo kazi yake, hiyo ilikuwa kazi ya mtangulizi wake Yohana Mbatizaji. Alichokifanya ilikuwa ni kwenda kwa Yohana na kujitiisha tu chini yake na kutoka hapo akawa na mtandao mkubwa na kusudi la kuwepo kwake likatimia.

Pengine huhitaji kujisema sana mitandaoni kwamba wewe ni mwalimu unahitaji tu kutembea na mwalimu fulani na uwepo wako tu pamoja naye utakufanya upate watu unaopaswa kuwafundisha.

Pengine huhitaji hata kuwaambia watu “wa-subscribe” chaneli yako ya You Tube ili kupata nyimbo zako. Unahitaji tu kutembea na mwinjilisti fulani katika mikutano yake na kwa kuhubiri pamoja naye kwa njia ya uimbaji katika mikutano yake utapata maelfu ya wasikilizaji.

**“Unahitaji watu watakaokutambulisha
kwa watu wengine, vinginevyo
utasumbuka sana.”**

Mungu atusaidie sana, kuna mambo hatuhitaji hata kuyahangaikia tunahitaji tu kupata watu ambao wao watazitambulisha huduma zetu na kupitia wao ulimwengu utatufahamu.

Swali unalopaswa kujiuliza ni je! Ni nani amabaye anakujuua vya kutosha kwa sababu umetumika pamoja naye kwa muda na anaweza kukusemea wewe na yale unayoyafanya kwa nguvu ya ushawishi wake?

Kama huna mtu/watu wa namna hii basi ujue itakuwa ngumu sana kupata mtandao. Ni wakati wako wa kutafuta watu ambao watakutambulisha kwa wengi. Na utawapata kwa kukubali kutumika chini yao. **Kazi kwako**

Baraka #9

Ushawishi

“Nawe [Musa] utaweka juu yake [Yoshua] sehemu ya heshima yako, ili mkutano wote wa wana wa Israeli wapate kutii.”

- Hesabu 27:20

Ushawishi ni hali ya watu kumfuata mtu kwa hiari yao kutokana na yale anayoyafanya hasa kama yanagusa maisha yao. Mtu mwenye ushawishi ni kiongozi.

Mtu yeyote anayetumika chini ya watu wengine au anayetumikia maono ya wengine ana nafasi kubwa ya kuwa kiongozi tena kiongozi bora.

Hii ni kwa sababu kigezo kikuu cha kuwa kiongozi (mkubwa) ni kuwatumikia wengine (kimaandiko). Kadiri unavyowatumikia wengine ndivyo unavyozidi kuwa kiongozi bora.

“Kigezo kikuu cha kuwa kiongozi ni kuwatumikia wengine.”

Hebu sasa tujifunze kwa kina namna tunavyoweza kuwa watu wenye ushawishi kwa kuanzia katika ngazi ya kutumika chini ya watu wengine.

Tutajifunza baadhi ya kanuni muhimu kutoka kwa watu kadhaa. Tukianza na Yoshua;

Yoshua Na Ushawishi

Biblia inasema;

Hesabu 27:18-20 *"Bwana akamwambia Musa, Mtwae Yoshua, mwana wa Nuni, mtu mwenye roho ndani yake, ukamwekee mkono wako; 19 kisha ukamweke mbele ya Eleazari kuhani, na mbele ya mkutano wote; ukampe mausia mbele ya macho yao. 20 Nawe utaweka juu yake sehemu ya heshima yako, ili mkutano wote wa wana wa Israeli wapate kutii.*

Kuna mambo ya muhimu tunaweza kujifunza hapa. Kwanza tunajua kuwa Yoshua alikuwa mtumishi wa Musa. Mungu anamwambia Musa amfanye Yoshua kiongozi badala yake.

Na anazidisha kusema ***"utaweka juu yake sehemu ya heshima yako..."*** Kwa maana nyingi nguvu ya ushawishi wa Yoshua inakuwa ni matokeo ya ile heshima ambayo Musa aliiweka juu yake. Je! Unajifunza kitu?

Ni hivi, tunapotumika chini ya watu wengine tunakuwa tunajiweka katika mazingira ya kupata heshima kutoka kwa watu kwa sababu ya vile tulivyotumika. Na kwa kufanya hivyo inakuwa rahisi kwetu kuwa viongozi.

"Kiwango chako cha ushawishi kwa watu wengine kitategemea sana kiwango cha ko cha kujitoa katika kutumika chini wengine."

Ilikuwa rahisi watu kumfuata Yoshua kwa sababu walijua vile alivyohusiana kwa ukaribu na Musa. Vivyo itakuwa rahisi sana watu kukufuata wewe kwa kutegemea na namna unavyohusiana na watu unatumika chini yao.

Timotheo

Kwa upande mwingine, Timotheo anakuwa kiongozi maeneo mengi kutokana na uzoefu wake wa kutumika chini ya Paulo. Uzoefu unaowafanya watu wamheshimu kama walivyomheshimu Paulo. Jaribu kutafakari.

Jambo kubwa tunalojifunza kuhusu ushawishi ni kwamba kadiri tunavyojitiisha chini ya watu wengine kuna heshima tunaipata kutoka kwao ambayo baadaye inawavuta watu wengine kwetu na hivyo tunakuwa na ushawishi kwao.

Hauhitaji kuhangaika kutafuta nafasi za uongozi, tafuta watu wenye heshima na anza kutumika chini yao. Ni suala la Muda tu na wewe utakuwa mkuu.

Baraka #10

Kuandaliwa Kuelekea Ukuu

"Kusudi kuu la kutumika chini ya wengine ni kutuandaa kwa ajili ya hatima zetu."

Baraka ya 10 inatoa hitimisho la kitabu chetu na zaidi sana inatufunulia lengo mama la kutumika chini ya watu wengi. Ambalo ni kutuandaa kwa ajili ya kuzifikia hatima zetu.

Narudia tena, kutumika chini ya watu wengine siyo utumwa bali ni uwanja wa mtu kuandaliwa kwa ajili ya ukuu alikusudiwa kuufikia tangu alipoumbwa na Mungu.

Hebu tujifunze kutoka kwa mifano ambayo tumeitumia kwa sehemu kubwa katika kitabu hiki;

Yoshua: Kwa kutumika chini ya Musa alikuwa anaandaliwa kuwa kiongozi atakayewafikisha wana wa Israeli katika nchi ya ahadi.

Ruthu: Kwa kutumika chini ya Naomi Mungu alikuwa anamwandaa ili kupitia yeye mfalme Daudi azaliwe na zaidi sana alikuwa anaandaliwa awe sehemu ya uzao Yesu Kristo.

Elisha: Kwa kutumika chini ya Eliya alikuwa anaandaliwa awe mrithi wa nafasi ya Eliya na zaidi sana awe sababu ya Mungu kutukuzwa katika mazingira yaliyokuwa yanamzunguka.

Timotheo: Kwa kutumika chini ya Paulo, Timotheo alikuwa anaandaliwa awe kiongozi wa makanisa na mtenda kazi wa karibu wa Paulo.

Yesu: Kwa kuanzia kwa Yohana Mbatizaji alikuwa anatengenezewa njia ili atimize kusudi kuu la kuukomboa ulimwengu mbali na dhambi.

Jiingize Katika Mchakato Wa Kuandaliwa

Mungu ana mpango na wewe na amekusudia kwamba kupitia wewe mambo makuu yatendeke ulimwenguni. Lakini huwezi kufika huko pasipo msaada wa watu wengine ndiyo maana umepata fursa ya kujifunza siri hizi.

Chukua hatua sasa, anza kwa kujitiisha chini ya watu au mamlaka ambazo Mungu ameziweka mbele yako kwa uaminifu. Kwa kufanya hivyo baraka zote tulizojifunza na nyingine nyingi zitakuwa sehemu ya maisha yako. Na zaidi sana utaifikia hatima yako kwa urahisi.

UBARIKIWE

MAREJEO

Longhorn. (2011). *Kamusi ya karne ya 21*. Dar es salaam, Tanzania: Longhorn publishers (T) Ltd.

The Holy Bible in Kiswahili. (2013). Dodoma, Tanzania: The Bible society of Tanzania.

Vitabu Vingine

Vitabu vingine vilivyoandikwa na Adriano Mkonda ni pamoja na;

1. Nguvu Ya Wazo
2. Kuwa Baraka Kwa Wengine
3. Kusudi 101
4. Maono 101
5. Malengo 101
6. Mafanikio Halisi
7. Sayansi Ya Muda
8. Mambo Yasiyo Ya Kawaida Kupitia Watu Wa Kawaida
9. Kijana Na Ujana
10. Sayansi Ya Kipaji
11. Nidhamu Binafsi
12. Nguvu Ya Kuanza
13. Uwekezaji Wenye Matokeo
14. Ulimwengu Wa Mitandao
15. Utoaji Unaomgusa Mungu
16. Kurejesha Njaa Ya Kiroho
17. Na vinginevyo

Kwa Mawasiliano Na Kujifunza Zaidi

Ikiwa umeguswa na ujumbe wa kitabu hiki, una swali, una maoni, ushauri, ushuhuda au unahitaji vitabu vingine, unaweza kuwasiliana moja kwa moja na mwandishi;

ADRIANO MKONDA

Simu/meseji/WhatsApp: +255 656 189 370, +255 621 618 821

Barua pepe: mkondaadriano10@gmail.com

Pia unaweza kupata mafundisho zaidi kutoka kwa Adriano
Mkonda kupitia;

DIVINE TRANSFORMATION GLOBAL (DITRA Global)

Barua pepe: ditraglobaltz@gmail.com

Facebook: Ditra Global Tanzania

Instagram: ditra_global

WhatsApp: +255 656 189 370

WhatsApp link:

<https://wa.me/message/WSSND7DQJGVC01>



Adriano Mkonda ni Mtanzania, mwalimu kitaaluma, mwalimu wa neno la Mungu, mwandishi wa vitabu na muasisi wa DIVINE TRANSFORMATION GLOBAL (DITRA Global).

Shauku yake kuu ni kuwaleta watu katika ukamilifu wa Kristo kwa kuwekeza kweli ya Mungu ndani yao ili wawe sababu ya ustawi wa jamii zao na ulimwengu kwa ujumla.


Hadi sasa Adriano amefanikiwa kuandika vitabu zaidi ya 15 pamoja na kufundisha makundi mbalimbali ya watu makanisani, mashuleni, vyuoni na katika mitandao ya kijamii.

Kupitia vitabu vyake na mafundisho yake watu wengi wanafikiwa na kweli ya Mungu, wanabadilishwa na kuinuliwa kila iitwapo leo.

Kwa mawasiliano na kujifunza zaidi

  +255 656 189 370  ditraglobal

 ditraglobaltz@gmail.com

 Ditra Global Tanzania